

interview met

[Jubileum: 50 jaor rapido](#) >> [Jubileumjaar](#)



Stel dich efkes

veur.....

Miene naam is Pieter Willemsen en ik bin al 37 jaor bliej met Toos.

Det kump umdet ik al 23 jaor euver de ganse waereld reis en dan is ut fijn asse weer thoès bis in dien eige umgaeving.

Ik werk al 27 jaor beej Kusters Engineering as technisch directeur.

Weej make machines um bankbiljette te vernietige en ik bin verantwoordelik veur de productanalyse.

Ôs klante zien Nationale banke en in idder land is maar ein Nationale bank.

De ièrste 6-7 jaor heb ik vuel binne Europa gereis en de letste 16 jaor euver de ganse waereld maar veural in China en India.

Miene vaste begeleider in China is Gao, dae haet mich waegwiès gemak in China en veurgelich euver de chinese gebroèke en laeveswiès.

Ik heb um un bietje euver de meneer van laeve beej ôs beejgebracht.

Wannièr waasse lid van Rapido en wielang bisse det gewaes.

Ik bin van 1976 tot 2007 lid gewaes van Rapido maar heb de letste jaore van mien lidmaatschap haos niks meigemak van de activiteite.

Mien sociaal laeve steit op un hièl lièg pitje door ut vuel reize.

Waas ut nog leuk naó Rapido.

Veur mich waal, ik haop veur ôch auk !

Umdet mien laeve zich gedeiltelik in ut boèteland aafspeult bisse neet zoë met Rapido bezig netuurlik.

Det kump umdet nemus in China wit waat Rapido is en miene venlose oètleg begrièpe ze neet.

Dao môt ik andere dinger in de gate halde en Toos hilt ut heej in de gate en hilt mich op de huegte.

Waat is de leukste of vervaelendste herinnering die se hebs oèt diene Rapidotièd.

Un jaor of 7 geleeje kwame Toos en ik op zaoterdaag truuk van vakantie toen Hay Smeets belde um te vraoge of ik zôndaags in woel valle op ut knômmeltoernooi.

Welke partner ik toen had weit ik neet mièr maar ut leep veur genne maeter.

Alsnog sorry as miene partner van toen dit artikel toevallig lues.

Ik had jaore nimmer aan sport gedaon dus niks lókde en nao éin partie waar ik al zoë stièf wie ein plank.

Stoer doorgaon netuurlik, ik heb de prièsoetreiking nimmer aafgewach maar bin thoès in un werm bad gaon ligge.

Toos meus mich in- en oet bad höffte want ik kôs nog nimmer mien eige bein ophöffte.

Waat un ellende, 's-nachs kreeg ik koorts van de spierpien en ut haet un waek gedeurd veurdet ik weer un bietje soepel kôs laupe.
Det ware mien letste badmintonherinneringe.

Welke sport duisse noow en waat zien dien hobby's.

Weej wandele gaer same, lekker boète aan de Maas b.v vlakbeej ôs hoés in Steyl.

As hobby heb ik 'n paar winters geleeje met un aantal manne unne Vinoloog-cursus gevolg beej de Volksuniversiteit.

Det klink toch hiël gezellig of neet en det waar ut auk. Dae cursus woord auk nog gesubsidieerd door de gemeente en dao kregte we ôngeviër 12 lesse veur. Vuel minse weite waarschienlik waal wie det geit.

De môs wien slörpe, laote rolle in de mônd en dan in un bekske oétspeeje.

Un stökske stokbroèd aete en dan det ganse proces weer opniej.

Vergits ze te dôk ut ônderdeil "oétspeeje", dan kumse toch met un behuurlik wienkópke thoès. Ik oefen noow geregeld met mate netuurlik, dao heb ik genne haekel aan en weit intösse iets miër van wien aaf.



Geisse gaer op vakantie en welke plek haet dien veurkeur.

Weej gaon ut leefste op vakantie met de sleurhut binne Europa en veural in gebiede wao wienboere zitte.

Det zien toevallig auk altièd moëje umgaevinge.

Neet det ik verstand heb van wienranke maar noow waal van wiensmake, zoë kinse dien hobby euveral oetofene.

De meeste nederlandse minse die naor un camping in ut boëteland gaon neme de petatte, de hagelslaag en de pindakiès mei.

Maar kômme weej örges terech wao toevallig gén droeve greuje dan neme we un paar fleskes gooje wien mei en laote de petatte zoëwiezoë thoès.

Op welke plek môsse volges dich eine kièr in dien laeve gewaes zien.

Dit zal waal gen good antwoord zien op de vraog maar ik bin ut leefste thoès.

As ik op reis bin mis ik toch altièd mien thoès, ofschoén ik niks te kort kôm huer.

Ik bin op hiël vuel plaatse gewaes en heb vuel gezeen maar de wils de moëje dinget die se meimaks

toch ut leefste deile met de minse wao se um gufs en die woëne heej.

Met wae zoelse unne kièr un beschuutje wille aete en waorum.

Ut liek mich te gek um met un braziliaans maedje un beschuutje te aete.

In Brazilië hebbe ze de moëjste en de meist sexy vrouwe, kièk maar ens naor den optoch in Rio de Janeiro.

Trouwes, det meug auk waat anders zien dan un beschuutje aete waat mich betref. Unne pittige samba danse of zoëiets.

Allein had ik det allemaol leever 25 jaor geleeje wille doen.
Maar druime kinse altièd!

Wao hebse unne groöte haekel aan.

Ik heb unne haekel aan de maondaag, dan wuert d'r op
ut werk altièd vergaderd.

Ik bin unne man van weinig weurd en op un
vergadering wuert d'r mich te vuel en te
lang gezwamp.

Veur mich geld ut motto: neet praote maar breie.

Vaerder hald ik neet van opschöppers det zien neet
mien favoriete vrinde.



Hebs dich un laevesmotto en waat is det.

Mien laevesmotto is simpel:

Doot maar gewoën, dan duisse gek
genög.

**Det zuusse waal op de foto
heejnaeve-----**

Hebse nog iets op te biechte, doot det dan noow (we vertelle ut neet door).

De letste kiëre det we mei zien gegaon op Rapidowiekend woel ik gaer met idderein
beejpraote.

Sômmige had ik jaore neet gezeen en de hebs tenslotte un vreej wiekend.

Maar nae huer, ut ganse wiekend stônd volgepland, dus ik kreeg d'r gaar neet de kans veur.

Vriedaags'-áoves had de organisatie al iets gek bedach of speulde de joekskepel.

Op zaoterdaag hadde we un wandeltoch met opdracht waosse auk nog wiskunde veur gehad
meus hebbe.

Op zaoterdaagaovend meuste we met ôs grupke waat veurdrage waat thoés al veurbereid
waar.

Ut toppunt van den aovend kwaam nao 11.00 oor toen ut galderbook teveurschien kwaam.

Nou, det deej veur mich de deur dich, dan kinse toch baeter naor bed gaon.

Ik vind ut nog steeds jaomer van de gemisde praotkanse.

Waoreuver wilse nog waat kwièt.

Rapido vënd ik eigelik gen badmintonclub maar miër un vrindeclub.

De kums jaore weinig naor de club en toch kinse den draod gemekkelik weer oppakke.

Ik weit netuurlik neet of det nao ôs nog zoë is!

Weej kômme zeker naor ut jubileumfees, allein al um den draod weer te vinde !

****Umdet Pieter zoëvuel leuke verhaole haet euver zien reize
in China kump d'r ind April un vervolg op dit interview.**

Elly van Elswijk

Commentaren

Pieter door N. Timmermans-Winter op 30-03-2010 om 19:43

Zowe as ik al dach:..... "Pieter,..... is eine échte laevesgenieter!"